

後化為高步於木坎在左手為斧指木星
 三過說即躡三度謂五行祝曰天綱中呪金
 水木火土金木相推七星煥煥天綱最威云
 云已上四法是消三界之災害五行之相剋
 若依此法行之一年身中五苦八難九厄百
 病自能除之此即是順本師履地紀躡斗傳
 度時受訖今即本命日修真出三界五行之
 法也註按太平經內品修真秘訣云上清大
 真人未昇天以前皆一一取本命之日發行
 四等法訣後步履斗星躡地紀昇登天門便
 入金闕玉臺而後聖君也五法總制五行於
 身之外身出五行之上註後聖君曰授天師
 訣制五行於身之外法六甲有六旬六旬之
 中皆有本命日先躡地紀即躡三台即履
 五星各須五遍請五行呪十八萬鍊珠上卷
 是訣即步火綱三遍順倒反三遍是也亦請
 順倒反三等呪訖即出東南地戶上立面西
 北存思將軍吏兵先存中元三將軍領吏兵
 如圖中元主人次下元三將軍領吏兵主地
 官奉身有功修行不闕次上元三將軍領吏

兵下迎次五德將軍次天公雷公等將軍各
 領兵馬百千萬眾五雲飛空金剛力士引身
 上朝太平金闕帝晨後聖君存之如三元將
 軍固具冠簡紫衣如法諸衛從如含弘等三
 國存之唯加具衣冠簡六法常以庚申初夜
 註初夜一更是己未日初夜入五更是庚申
 日定之也思存出如含弘圖以斷截三界災
 厄三尸六魔三官九地落滅罪根添益壽筭
 落除三官死簿注上生曆神真之位單叩齒
 三十六遍握固即捨本身司命訣服去三尸
 之符註符在五十四將軍靈書中畢即任安卧
 卧起五更二點前後又思存一如前法一度
 訖吞符行之一十二度三尸盡永去死亦不
 敢來便是上真之人可貴可保此法微妙不
 可妄傳非人殃及七祖矣

金鎖流珠引卷之十五

六甲者五行之子也註道生元炁一生二陰
 陽是二生三三元是三生四四時是四生五
 五行是五行生六甲甲子甲戌甲申甲午甲
 辰甲寅是六甲生七星七星生九精九精生
 十千十千生十二支十二支生二十八宿二
 十八宿生三十五神官三十五神官生四十
 九星四十九星生六十四卦星六十四卦星
 生八十一極數星星數陰陽故之曰小數之
 極故說古法數極八十有一今此八十一生
 萬象周天不可知極之數也三等上符符
 書入上元註號之老君六甲符合服者是也
 謂之老君內秘三符六甲錄世人遇之者志
 心修行有功去百病來六神註一神六甲將
 軍二六甲直日人官三六甲玉童玉女四直
 日神從官五直符六符吏等六神也使捕邪
 檢精无不通靈學進步躡无此不成如有志

金鎖流珠引卷之十六

六甲陰功上

中 華 仙 人 李 傳 風 法

此記之行世世之人但不應不受不服他自
 收藥拜而自伏去更不敢犯人往往有此令
 人著功得道卿於諸教告有心令先修功三
 元六甲久自通神此法微妙不可妄傳非人
 老君曰此法有六通神力一能通入大道之
 門善假道威伏神使鬼制滅精妖斬斷凶祟
 二能通天感使天神天龍誅魔伏妖收雲攝
 雨逆橫秋惡之炁甚能攝除之三則通地感
 使地神地龍風雲雷公雷師雨師風師五嶽
 四鎮註四鎮謂之四瀆水官之鎮也九州
 千邦萬國土地山川神靈社廟城隍註城隍
 神是後聖君許地府置之蘇吳紀云吳王
 芮是左社右稷神官使令助國護身家濟人
 物四則通水感使水神水龍水中君官將軍
 靈吏魚鱗獸等令佐道護身助家國濟人物
 五則通感衛於人人能久修服使身家出於
 五行永除五苦八難九厄百病自消超出三
 界得入長生驅使天地水三官神靈立到分
 明六則能通感使七星北斗君神妃后女註
 北斗中有一正后三妃二夫人并二嬌女皆

為北斗之七君位號也等以主世人之死簿
 世人知之以多取六甲日作圖先步地紀次
 天綱次禹步三等註三等主三元數也世人
 步綱以地紀為上元仙人步綱以天綱為上
 元也尹奇子曰世人身未出三界步地紀為
 先則為上元仙人身出水火三界即步天綱
 為先則為上元且步綱法須終三等是謂之
 步綱數也謂之天地人是應出三界三災之
 法身入神仙長生不死之道有訣在流珠上
 引中註訣上引第一卷中世人學道者可明
 此一條足知六甲六通得離水火三界之法
 去七宿之災害註夫世人不論貴賤大小生
 則南斗所主王炁今早得生榮長年領人不
 死死則北斗所主衰炁今早得疾病窮極而
 死後聖者大惡之故以前後易身出世告命
 靈符秘法演金鎖演珠新名改易金籙舊籍
 明出天綱地紀步綱之道以制伏北斗中六
 陰之神災害永承出長生仙道得離北斗之
 下世人通者皆知奉行而有功此斗中六
 陰宮神君妃后嬌女等畏而受使使之為衣

隨手指轉天關攝天魔地妖皆伏此是後聖
 君大傳中言令人得道上昇雲天太上老君
 敕六甲秘符文曰吾服六甲符初先師令服
 投文為之六十日始漸知一百二十日百病
 退二百四十日百病消除三百六十日玉女
 來侍衛魂魄往往夢中如見千日玉女當直
 日分直神直官註往往有靈瑞徵驗事不在
 古之限二千日行符神驗身入神仙直神如
 人往來見但言之自當身不多見衛近人
 也註按此說老君不用人多言見於直符兵
 史玉童玉女等恐世人疑言相謗為妖毀存
 正真故以代代相授令正一心直入元為之
 道无感无邪无非无失得一者也三千日六
 甲玉女常多見身一十四年上昇天入搖光
 低昂北斗註夫人行步綱得通須今登北斗
 後即上入天宮故北斗領迎此人故謂入搖
 光低昂北斗是也北斗為低搖光之下迎
 老君曰若欲步七星六甲先成註為人魂魄
 皆畏北斗故吞符服六甲能生於人故魂魄
 不畏北斗也故六甲能生於人故魂不畏常

是此乎所以代聖人意取為網步之一令
魂魄不畏二伏北斗為之求使之如從僕敬
之如兄材欲步九跡六甲先積註積服符修
行積也皆六甲功也其六甲有三等軍亦有
三等府院註府院如三軍營亦有三府也

上等者上元太一府六甲軍也註在太極之
中謂之天上六甲軍營府也有三官將以管
將軍從官玉童玉女各具老君六甲祕符錄
中兵士三百六十萬人眾以制陰陽五行之
逆悉也故在上太一之府上真中宮中鍊河
源下鎮人世使四時行令不失五行變化符
時者以太一使者王之一軍上鎮天官制
魔保舉得道之人太一使者每一年三奏太
上道君及後聖君也天師曰今上等老君六
甲一君佐衛在太平金闕後聖玉皇上道君
殿左階下立註如世天子會立正朝之卿也
亦有左右每一年三大朝立仙真旗仗旌節
命魔威神制鬼之心令以道威正肅天地人
神龍鬼制魔保舉有道消伏禍過也一年之
中三朝會禮也註每年上元一會五月十五

日是中元一會七月十五日是下元一會十
月十五日是一年有此三日天地水三元五行
六甲等神人真仙官兵將玉童玉女等皆一
一隨天真大仙佐衛輔於玉皇上道君殿前
明檢十天之內驅分左右無記有心前言成
道之真人見在未來其數檢檢生民十天之
內善惡功過俱一一來閱玉皇玉皇面勅三
官各令制伏凶惡令御生死託受迴內賢愚
分判罪善允其平等列記十天勿令死心屈
於生死世界明付司令也

中等靈飛六甲一軍佐衛在太平金闕後聖
君玉皇上道君殿右階下立註俱同在會日
月也
下等陰陽六甲在人世記配金木水火土得
人之命相生相剋之候候吉凶而相匹配也
註此言在世人夫妻水火相刑相剋之事我
行大道自消此相剋也
右此三等六甲世學之人知此三等六甲之
法六功修服步躡萬事應心自消陰速於水
火陰取長生疾於步躡註言陰取長生者言

修行服老君六甲符及靈飛六甲符功者更
著更行步躡天網地紀之功著成於步躡
是知上中二等修服之功一等以命運匹配
相扶相生相順之功志人善行註下等列自
有引在上卷中言五行立入長生第二等者

靈飛六甲上元正一府也謂之靈飛六甲軍
右營營中官將一同左府具註具官將兵士
同於左老君六甲軍營官品人數是也唯玉
女一旬十人直經錄且老君內符六甲一旬
一人五女直也旬將二人其靈飛六甲玉女
即十八直而元神將當直經錄也但世人學
道之者悉不知有此六甲左右軍之法即去
道漸遠不知從何門而入見道也此門前聖
後聖皆因此門成道人總莫知唯世有葛氏
繼代總自知之為其用不依道多作變術成
於世人後聖君大惡之但與繼代不死之道
而不得昇天任仙官之位風常念其修行尋
求志要門戶之人盡皆不得門戶或有遇者
又用之太多不依其理今故以舉錄其大
道之性以曉後生也官將兵士也而號曰靈

飛六甲衛道右軍將軍天兵也所以太一君為左天師君為右各舉功過之事也

金鎖流珠引卷之十六

金鎖流珠引卷之十七

言七

中 華 仙 人 李 淳 風 注

六甲陰功上之上

太上老君常敕左右軍修舉其功過

滿三十者可遷仙位過犯三十條者逐仙一階敕三官故常令甲子日言奏文狀在於六甲君官將吏等多以取甲子日言功功是陰功也其陰功有六註一每日心禮天尊前聖後聖太上大道君天帝三尊三元等君言此功自在師口訣交法之時須口一一上問記取莫忘此是口言功為第一秘法夫修行人不得此法存種百無有過不知次第而行功天曹並不登錄事須一一得師口訣以傳授身心俱受畢便吞符功可上天記錄一一與子言其多少也聞奏不絕也今具列言陰功陰德陽功陽德各具有七條墨書是前聖虛皇上帝大道君授合仙之人骨命不合仙不授註前聖太上老君是也朱書是後聖玉皇上帝上道君授合真之人不合真不授註

夫為師傳法皆須細試弟子察其情性若多陽功不須與授內陰功有三前聖授三皇君及四十九真人俱得仙一則身授道後內以直心陰修救度人物疾病自身常服二等六甲計日言功前修老君六甲三年服符遺炁鎮神安心炁治五藏光明神力有濟世濟者以符試救人疾厄得差度者謂之神力通濟人之難得神之力上感道恩德合天心功故得一人一物命謂之功濟也即添服靈飛六甲符便以計修年月日修行之功謂之第一陰功也後聖君告東海青童君及諸天諸方合為註合為者是告此法之時未得為仙真之位猶是志心求修人未得成道受此法後皆十年十五年十四年八年九年得道成大真人後聖君知其識性合為真人故言合為大真人也大真人曰夫志人識性真心修求大道皆須內著陰功陽德即積此功德而為真人在陰功陽德具後注說非從宿因前業所種生命骨體合道註宿因說生合官職所種即合有少許來由若說求真情性俱失此